

# Enam jam kutip satu tan sampah di lebuh raya

WALAU di mana jua berada, sikap bertanggungjawab dan menjaga kebersihan perlu menjadi amalan bagi mewujudkan masyarakat yang harmoni Sekali gus, menjaga kehijauan alam.

Akhbar Kosmo! pada 29 Jun lalu melaporkan lebih 60 ahli Jabatan Amal Malaysia Kelantan dan Kuala Lipis, Pahang bergotong-royong mengutip dan membersihkan longgokan sampah sarap di sepanjang 78 kilometer (km) Lebuh Raya Lipis-Gua Musang.

Tinjauan Kosmo! mendapati, saluran longkang dan tepi jalan di sepanjang lebuh raya berkenaan dipenuhi sampah sarap. Sampah sarap tersebut dibuang oleh pengguna lebuh raya yang berdepan kesesakan lalu-lintas ketika mahu pulang beraya baru-baru ini.

## Operasi khas

Pengarah badan amal tersebut, Nik Asmawi Nik Abdullah berkata, pihaknya menjalankan operasi bersih khas di lebuh raya tersebut selepas ia tular di laman sosial. Sisa-sisa makanan dan sampah sarap tersebut ditinggalkan pengguna jalan raya



SITI JAMILAH



ZAID

ketika berbuka dan bersahur ketika dalam perjalanan pulang ke kampung.

Katanya, semua pasukan amal dari Kelantan dan Kuala Lipis yang menyertai program gotong-royong memulakan operasi mengutip sampah bermula dari pukul 8.30 pagi sehingga pukul 2 petang.

"Antara sampah sarap yang ditinggalkan pengguna lebuh raya ialah bekas makanan segera, lampin pakai buang, tin minuman dan lain-lain."

"Anggaran sampah sarap yang dikutip hampir enam jam ini mencecah satu tan. Longgokan sampah kemudian dilupuskan di susur keluar Chegar Perah," katanya

**GOTONG-ROYONG**  
boleh memupuk sikap bertanggungjawab dan menjaga kebersihan.  
— Gambar hiasan



PERSEKITARAN yang kotor akan membentuk keperibadian kurang baik.  
— Gambar hiasan

dalam satu kenyataan baru-baru ini.

Seorang pengguna lebuh raya, Siti Jamilah Mohd. Zain, 31, mengutuk perbuatan tidak bertanggungjawab itu kerana ia menyusahkan pengguna jalan raya kerana longgokan sampah menghalang lalu lintas.

"Perbuatan tersebut tidak sepatutnya terjadi dan ia sangat memalukan malah menggambarkan sikap seseorang yang mementingkan diri sendiri."

"Longgokan sampah itu jika dibiarakan akan mengundang kecelakaan dan kemalangan jalan raya maka, ia merupakan perlakuan yang sangat tidak munasabah dan tidak bertamadun," katanya yang berasal dari Tanah Merah, Kelantan.

## Keperibadian

Guru yang bertugas di Subang Jaya, Selangor itu terpaksa menempuh jarak perjalanan kira-kira tujuh jam untuk sampai ke kampung halaman. Justeru, dia menyediakan plastik di dalam kereta untuk mengumpul semua sampah.

Tindakan itu diambil bagi memastikan kebersihan terjaga kerana lebuh raya itu tiada hentian Rehat dan Rawat (R&R).

Siti Jamilah yang menetap di Putra Heights, Subang Jaya, Selangor turut merakamkan ucapan terima kasih kepada ahli Jabatan Amal Malaysia Kelantan dan Kuala Lipis yang bertungkus-

lumus membersihkan kawasan lebuh raya itu.

Bagi mengatasi masalah tersebut pada masa akan datang, dia turut mencadangkan agar dibina hentian R&R bagi memudahkan pengguna jalan raya berehat.

"Pada musim raya, kami sering mengalami masalah kesesakan lalu lintas dan terperangkap kira-kira tiga jam. Maka, hentian R&R penting bagi pengguna berehat seketika," jelasnya.

Sementara itu, pensyarah di Jabatan Pengajian Kenegaraan dan Ketamadunan, Fakulti Ekologi Manusia, Universiti Putra Malaysia, Prof. Dr. Zaid Ahmad berkata, keperibadian seseorang terbentuk dalam empat pengaruh utama iaitu budaya, sistem nilai, persekitaran yang mempengaruhi sikap dan pendidikan.

"Boleh dikatakan lebih 90 peratus rakyat Malaysia mendapat pendidikan sekurang-kurangnya sekolah rendah tetapi malangnya ia masih belum cukup untuk mengekang perbuatan tidak bertanggungjawab itu."

"Ia berikutan sikap dan pandangan mereka terhadap perkara tersebut dan menganggapnya remeh," katanya ketika dihubungi Kosmo!

Tambahnya, pemindahan nilai dan ilmu akan membentuk keperibadian serta sikap yang perlu diterapkan sejak kecil lantas diterjemahkan dalam kehidupan sehari-hari.

